

摘藻堂四庫全書薈要

史部

欽定四庫全書薈要卷五千四百九十二

舊五代史卷九十一

宋門下侍郎參知政事監修國史薛居正等撰

晉書第十七

列傳六

房知溫字伯玉兖州瑕丘人也少有勇力籍名于本軍

為赤甲都官健

王堂問話知溫少年與外弟徐某為盜于兖鄆之境

梁將葛從

周鎮其地選寘麾下時部將牛存節屯于鎮好搏博每

求辨來者知溫以善博見推因得侍左右遂熟于存節
及王師範遣劉鄩據兗州梁祖命存節將兵討之知溫
夕縋出奔存節喜而納焉明夜竊良馬一駟復入城鄩
乃擢為裨將鄩降隸于同州劉知俊知俊補為克和軍
使知俊奔岐改隸魏州楊師厚以為馬鬪軍校漸升至
親隨指揮使繼加檢校司空莊宗入魏賜姓名紹英改
天雄軍馬步都指揮使加檢校司徒澶州刺史行臺右
千牛衛大將軍莊宗平梁歷曹貝州刺史權克東北面

蕃漢馬步都虞候遣戍瓦橋關明宗自鄴入洛知溫與
王晏球首赴焉明宗自總管府署知溫滑州兩使畱後
天成元年授兗州節度使明宗即位詔充北面招討屯
于盧臺軍以盧文進來歸加特進同平章事賞招討之
功也後除烏震為招討副使代知溫歸鎮知溫怒震遽
至有怨言因縱博誘牙兵殺震于席上會次將安審通
保騎軍隔河按甲不動知溫懼不濟乃束身渡水復結
審通逐其亂軍以奏時朝廷姑息知溫下詔于鄴盡殺

軍士家口老幼凡數萬清漳為之變色尋詔遣知溫就
便之鎮以安反側俄改徐州節度使加兼侍中會朝廷
起兵伐高季興授荆南招討使知行府事尋丁母憂起
復雲麾將軍墨綬即戎竟無功而還長興中節制汶陽
越二年除平盧軍節度使累官至開府儀同三司檢校
太師兼中書令封東平王食邑五千戶食實封三百戶
天福元年冬十二月辛巳卒于鎮贈太尉歸葬于瑕丘
詔立神道碑知溫性麤獷動罕由禮每迎待王人不改

戎服寡言笑多縱左右排辱賓寮他日知悞亦無愧色
始與唐末帝嘗失意于杯盤間以白刃相恐及末帝卽
位知溫憂甚末帝乃封王爵以寧之也知溫徑赴洛陽
申其宿過且感新恩末帝開懷以厚禮慰而遣之及還
郡厚餼不已積貨數百萬治第于南城出則以妓樂相
隨任意所之曾不以政事為務有幕客顏衍者正直之
士也委曲陳其利病知溫不能用焉及高祖建義入洛
尚不即進獻耀兵于牙帳之下衍正色謂曰清泰富有

天下多力善戰豈明公之比而天運有歸坐成灰燼今
青州遷延不貢何以求安千百武夫無足為恃深為大
王之所憂也知溫遂馳表稱賀青人乃安未幾以沈湎
成疾而卒部曲將吏分其所聚例為富室行又勸其子
彥儒進錢十萬貫以助國用朝廷除彥儒為沂州刺史
其家幸獲保全皆衍之力也

王建立遼州掄社人也曾祖秋祖嘉父弁累贈太保建
立少鷙猛無檢明宗領代州刺史擢為虞候將莊宗鎮

晉陽以諸陵在代郡遣女使饗祭其下有擾于民者建

立必捕而笞之莊宗怒令收之為明宗所獲而免由是

知名明宗歷遷藩鎮皆署為牙門都校累奏加檢校司

空及明宗為魏軍所迫時皇后曹氏淑妃王氏在常山

使建立殺其監護并部下兵故明宗家屬因而保全及

即位以功授鎮州節度副使加檢校司徒旋為留後未

幾正授節旄繼加檢校太尉同平章事會王都據中山

叛密使通弟兄之好

通鑑王都陰與謀河北故
事建立陽許而密奏之

安重誨

素與建立不協知其事奏之明宗慮陷建立尋徵赴闕

通鑑立奏重誨專權來八朝

面言其狀帝許之遂赴闕

拜右僕射兼中書侍郎平

章事判鹽鐵戶部度支充集賢殿大學士天成四年出
為青州節度使五年移鎮上黨辭不赴任請退居邱園
制以太子少保致仕建立自是鬱鬱不得志長興中嘗
欲求見中旨不許皆重誨蔽之也清泰初末帝召赴闕
授天平軍節度使建立少歷軍校職當捕盜及位居方
伯為政嚴烈閭里有惡跡者必族而誅之其刑失于八

者不可勝紀故當時人目之為王塚壘言殺其人而積其屍也後聞末帝失勢殺副使李彥贇及從事一人報其私怨人甚鄙之高祖即位再為青州節度使累加檢校太尉兼中書令建立晚年歸心釋氏飯僧營寺戒殺慎獄民稍安之天福二年封臨淄王明年封東平王五年八覲高祖曰三紀前老兄宜賜不拜仍許肩輿入朝上殿則使二宦者掖之論者榮之尋表乞休致高祖不允乃授潞州節度使割遼沁二州為上黨屬郡加檢校

太師進封韓王以光其故里至鎮踰月而疾作有大星墜于府署建立即召賓介竺岳草遺章又謂其子守恩曰榆社之地桑梓存焉桑以養生梓以送死余生為壽宮刻銘石室死當速葬葬必從儉違吾是言非孝也旋以病篤而卒年七十冊贈尚書令建立先人之墳在于榆社其岡阜重複松檜靄然占者云後出公侯故建立自為墓恐子孫易之也子守恩周書有傳

康福蔚州人世為本州軍校祖嗣蕃漢都知兵馬使累

贈太子太師父公政歷職至平塞軍使累贈太傅福便
弓馬少事後唐武皇累補軍職充承天軍都監莊宗嗣
位嘗謂左右曰我本蕃人以羊馬為活業彼康福者體
貌豐厚宜領財貨可令總轄馬牧由是署為馬坊使大
有蕃息及明宗為亂兵所迫將離魏縣會福牧小坊馬
數千匹于相州乃驅而歸明宗即位授飛龍使俄轉磁
州刺史充襄州兵馬都監尋以江陵叛命朝廷舉兵伐
之以福為荆南道行營兵馬都監俄以王師無功而還

福善諸蕃語明宗視政之暇每召入便殿諮訪時之利病福即以蕃語奏之樞密安重誨惡焉常面戒之曰康福但亂奏事有日斬之福懼會靈武兵馬畱後韓得以人情不協慮為所圖上表請帥制加福光祿大夫檢校司空行涼州刺史充朔河河西等軍節度靈威雄警甘肅等州觀察處置管內營田押蕃落溫池權稅等使福之是拜蓋重誨嫉而出之福泣而辭之明宗宣重誨別與商議重誨奏曰臣累奉聖旨令與康福一事今福驟升

節鎮更欲何求況已有成命難于改移明宗不得已謂
福曰重誨不肯非朕意也福辭明宗曰朕遣兵援助勿
過憂也因令將軍牛知柔領兵送赴鎮行次青岡峽會
大雪令人登山望之見州下煙火吐蕃數千帳在焉寇
不之覺因分軍三道以掩之蕃衆大駭棄帳幕而走殺
之殆盡獲玉璞羊馬甚多到鎮歲餘西戎皆款附改賜
福耀忠匡定保節功臣累加官爵福鎮靈武凡三歲每
歲大稔倉儲盈羨有馬千馮因為人所譖安重誨奏曰

累據使臣所言康福大有寶貨必負朝廷明宗密遣人謂曰朕何負于卿而有異心耶福奏曰臣受國重恩有死無貳豈願負于聖人此必讒人之言也因表乞入覲不允及再上章隨而赴闕移授彰義軍節度使又轉邠州檢校太傅清泰中移鎮秦州加特進開國侯充西面都部署高祖受命就加檢校太尉開國公未幾又加同平章事及移鎮河中加兼侍中以天和節入覲改賜輸忠守正翊亮功臣加開府儀同三司增食邑至五千戶

實封五百戶久之受代歸闕天福七年秋卒于京師年五十八贈太師諡曰武安福無軍功屬明宗龍躍有際會之幸擢自小校暴為貴人每食非羊之全髀不能飫腹與士大夫交言慴無所別在天水日嘗有疾幕客謁問福擁衾而坐客有退者謂同列曰錦衾爛兮福聞之遽召言者怒視曰吾雖生于塞下乃唐人也何得以為爛奚因叱出之由是諸客不敢措辭復有末客姓駱其先與後唐懿祖來自金山府因公譙福謂從事輩曰駱

評事官則卑門族甚高真沙陀也聞者竊笑子三人長
曰延沼歷隨澤二州刺史次曰延澤延壽俱歷內職焉
安彥威字國俊代州崞縣人少時以軍卒得隸唐明宗
麾下彥威性善射頗諳兵法明宗愛之累歷藩鎮彥威
常為衙將所至以謹厚見稱明宗八立秦王從榮鎮鄴
都以彥威為護聖指揮使從榮判六軍彥威入司禁衛
遙領鎮州節度使高祖即位尤倚彥威即拜為北京副
守加同平章事

通鑑彥威入朝上曰吾所重者信與義
昔契丹以義救我今以信報之聞其

徵求不已公能屈節奏之深稱朕意對曰陛下以蒼生之故猶卑辭厚幣以事之臣何屈之有上悅移鎮

宋州是時河決滑州命彥威集丁夫塞之彥威出私錢募民治隄隄成滑人賴之遷西京畱守歲飢彥威開倉廩賑飢有法犯者皆寬貸民免于流散彥威之力也旋丁母憂哀毀過制少帝與契丹構釁授彥威北面行營副都統彥威悉率家財佐軍人稱其忠開運中卒贈太師彥威與太妃為同宗少帝以舅事之彥威未嘗自以為言及卒太妃與少帝臨喪人始知為國戚聞者益重

其人焉

李周字通理邢州內邱人也唐潞州節度使抱真之後
曾祖融祖毅父矩皆不仕周年十六為內邱捕賊將以
任使自負時河朔羣盜充斥南北交兵行旅無援者不
敢出郡邑有士人盧岳家于太原攜妻子囊橐寓于逆
旅進退無所保唯與所親相對流涕周憫其情援送以
歸行經西山中有賊夜于林麓間俟之射盧岳中其馬
周大呼曰爾為誰耶賊聞其聲相謂曰李君至此矣即

時散走岳全其行裝至于家周將辭去岳謂周曰岳明
歷象善知人子有奇表方頤隆準眉目疎朗身長七尺
乃將相之材也河東李氏將有天下子宜事之以求富
貴周辭以母老而歸既而梁將葛從周拔邢洛唐武皇
麾兵南下築壘于青山口周向背莫決因思盧岳之言
乃投青山寨將張污落武皇賞之補萬勝黃頭軍使武
皇之平雲州莊宗之戰栢鄉周皆有功遷匡霸都指揮
使莊宗入魏率兵屯臨河楊劉所至與士伍同甘苦周

尤善守備一日奔母喪以他將代之既出則其城將陷

莊宗即遣追之使墨纒從事會莊宗北征周與寺人焦

彥賓守楊劉城

九國志焦彥賓傳彥賓字英服滄州清池人少聰敏多知畧事武皇尤所委信

及莊宗即位遷左監門衛壯將同正四方館使出護邢州軍

梁將王彥章以數萬衆

攻之周日夜乘城躬當矢石使人馳告莊宗請百里趨

程以紓其難莊宗曰李周在內朕何憂也遂日行二舍

不廢畋獵既至士衆絕糧三日矣及攻圍既解莊宗謂

周曰微卿守拒之勞諸公等為梁人所擄矣同光中歷

相蔡二州刺史及蜀平授西川節度副使天成二年春
遷遂州兩使畱後尋正授節旄未幾受代歸闕三年秋
出為邠州節度使會慶州刺史竇廷琬據城拒命周奉
詔討平之長興清泰中歷徐安雍汴四鎮所至無苛政
人皆樂之高祖有天下復鎮邠州累官至檢校太師兼
侍中及罷鎮赴闕會少帝幸澶洲以周累朝耆德乃命
為東京畱守車駕還京授開封尹及遘疾夢焚旌旗鎧
甲因自嗟嘆上章請退尋卒于官時年七十四詔贈太

師陪葬于明宗徽陵之北

張從訓字德恭本姑臧人其先迴鶻別派隨沙陁徙居雲中後從唐武帝家于太原從訓遂為太原人祖居政雲州長史識蕃字通佛理父存信河東蕃漢馬步軍都指揮使武皇賜姓名眷同親嫡前史有傳天福中贈太師中書令追封趙國公從訓讀儒書精騎射初為散員大將天祐中轄沙陁數百人屯壺關十餘歲節度使李嗣昭委遇之莊宗與梁人相拒于德勝口徵赴軍前補

充先鋒遊弈使俄轉雲捷指揮使檢校司空賜名繼鸞
從諸子之行也明宗徵時嘗在存信麾下為都押牙與
從訓有舊及即位授石州刺史復舊姓名歷憲德二州
刺史高祖之鎮太原也為少帝娶從訓長女為妃清泰
初授唐州刺史三年高祖舉義從訓奉唐末帝詔徵赴
行在分領鄉兵次于圓栢谷兵敗宵遁潛身民間高祖
入洛有詔搜訪月餘乃出焉及見戚里之故深加軫惻
尋授絳州刺史檢校太保在任數年天福中卒于官年

五十二少帝以后父之故超贈太保弟從恩仕皇朝為右金吾衛上將軍卒

李繼忠字化遠後唐昭義軍節度使兼中書令嗣昭之第二子嗣昭唐書有傳繼忠少善騎射從父征討有功莊宗手制授檢校兵部尚書充感義馬軍指揮使改潞府司馬加檢校尚書右僕射充安義都巡檢使天成中自北京大內皇城使轉河東行軍司馬入為右驍衛將軍未幾授成德軍司馬加檢校司徒高祖即位二年三

月授沂州刺史加檢校太保尋移棣州刺史繼忠舊苦
風痺皆辭以地遠乃授單州刺史仍加輸忠奉國功臣
三年入為右神武統軍四年三月出領隰州七年八月
移刺澤州開運元年復入為右監門大將軍三年秋以
疾卒于東京年五十一始繼忠母楊氏善治產平生積
財鉅萬及高祖建義于太原楊已終繼忠舉族家于晉
陽時以諸軍方困契丹援兵又至高祖乃使人就其第
疏其複壁取其舊積所獲金銀紈素甚廣至于巾屨瑣

屑之物咸取足高祖既濟大事感而奇之故車駕入洛
繼忠雖有舊恙連領大郡皆楊氏之力也

李頊陳州項城人即河陽節度使兼侍中罕之子也罕
之梁書有傳唐光啓中罕之與河南張全義為仇交相
攻擊罕之兵敗北投太原武皇以澤州處之罕之將赴
任畱頊為質焉時莊宗未弱冠因與頊遊處甚相昵狎
光啓初罕之自澤州襲據潞州送款于梁武皇以頊父
叛將殺之莊宗密與駿騎使逃出境頊遂奔河南梁祖

以其父子歸已委遇甚厚天福中梁祖自鳳翔送唐昭
宗歸長安畱軍萬人命姪友倫與頃總之以宿衛為名
及梁祖逼禪累掌禁兵倚為肘腋庶人友珪立授頃檢
校尚書右僕射右羽林統軍梁末帝之誅友珪頃預其
謀尋歷隨州刺史復為右羽林統軍同光初莊宗入汴
召頃見之莊宗忻然授衛州刺史加光祿大夫檢校太
保明宗朝授衍州刺史長興中檢校太傅右神武統軍
高祖即位之二年加特進檢校太尉右領軍衛上將軍

三年進封開國伯五年遷左領軍衛上將軍尋以病卒年七十制贈太師頃性溫雅不暴虐凡刺郡統衆頗有畏愛及卒人甚惜之子彥弼在太原日因頃走歸梁朝武皇怒下蠶室加熏腐之刑後籍于內侍省卒焉

周光輔太原人後唐蕃漢馬步總管幽州節度使德威之長子也德威有傳在唐書光輔年甫十歲補幽州中軍兵馬使有成人之志德威以牙軍委之麾下咸取決焉及長體貌魁偉練于戎事父卒授嵐州刺史從莊宗平

梁遷檢校尚書左僕射汝州防禦使仍賜協謀定亂功

臣天成初移汾州四年入為右監門衛大將軍長興清

泰中歷陳懷磁三郡繼加檢校司徒高祖即位授蔡州

刺史歲餘卒于郡時年三十五贈太保光輔以功臣子

歷數郡皆無溫政竟善終于官雖享年不永亦可嘉也

光輔有弟數人光貞歷義乾二州刺史入為諸衛將軍

光遜繼為蔡州刺史光贊任青州行軍司馬及楊光遠

叛滅貶商州司馬會赦徵還尋卒于家

符彥饒唐莊宗朝蕃漢總管存審之第二子也存審唐書有傳彥饒少驍勇能騎射唐天祐十五年冬莊宗與梁大戰于胡柳陂彥饒與弟彥圖俱從其父血戰有功莊宗壯之因用為騎將同光中以功授曹州刺史明宗即位改刺沂州天成中屯守梁園會起軍北戍塞下時有偏校以宣武乏帥迫彥饒為之彥饒給許其請明日殺為惡者奏之時人嘉其方畧長興中為金州防禦使為政甚有民譽其後畧遷節鎮天福中為滑州節度使

累官至檢校太傅二年七月范延光據鄴都叛朝廷遣
侍衛馬軍都指揮使白奉進率騎軍三千屯于州之開
元寺一日彥饒與奉進因事忿爭于牙署事具奉進傳
中是時奉進厲聲曰爾莫是與范延光同反耶拂衣而
起彥饒不啗帳下介士大譟擒奉進殺之奉進從騎散
走傳呼于外時步軍都校馬萬次校盧順密聞奉進被
害即率其部衆攻滑之子城執彥饒以出遣裨校方太
拘送闕下行及赤岡南高祖遣中使害于路左

羅周敬字尚素鄴王紹威之第三子也紹威梁書有傳
周敬幼聰明八歲學為詩往往傳于人口起家授檢校
尚書禮部員外郎梁乾化中以兄周翰節制滑臺卒于
官乃以周敬繼之命為兩使畱後尋正授旄鉞時年十
歲未幾改授許州節度使繼加檢校尚書左僕射踰三
年徵授秘書監檢校司空駙馬都尉尚梁普安公主旄
移光祿卿莊宗即位歷左右金吾大將軍初唐天祐中
紹威嘗建第于洛陽福善里及莊宗入洛以梁租庸使

趙巖宅賜明宗同光中明宗入洛以趨內稍遠乃召周敬議易其第周敬諾之後明宗即位一日夢中見一人儀形瓌秀若素識者夢中問曰此得非前宅主羅氏子及寤訪其子孫左右對曰周敬見列明廷召至果符夢中所見明宗謂侍臣曰朕不欲使大勲之後久無土地因授同州節度使加檢校太保長興中入為左監門衛上將軍四遷諸衛上將軍天福二年卒時年三十二贈太傅

鄭琮太原人也始事唐武皇為五院軍小校屢有軍功
莊宗在河上為馬步都虞候戎伍之事一覩不忘凡所
詰問應答如流故所在知名唐同光末從明宗伐魏州
時軍情有變明宗退守魏縣未知趨向安重誨將徵兵
于四方琮在帳前歷數諸屯軍及主將姓名因附口傳
檄相次而至明宗即位嘉其功授防州刺史秩滿父老
請畱三年授左羽林統軍唐長興二年二月出刺武州
高祖即位復居環衛久之以俸薄家貧鬱鬱不得志天

福中以疾終于官贈司徒

舊五代史卷九十一

舊五代史卷九十一攷證

晉列傳六房知溫傳及末帝即位知溫憂甚案歐陽

史作愍帝出奔知溫乘間有窺覷之意與是書微異

王建立傳以太子少保致仕案通鑑作以太傳致仕

歐陽史從是書

康福傳靈武兵馬留後韓潯韓潯通鑑歐陽史俱作

韓洙弟澄

福鎮靈武凡三歲每歲大稔倉儲盈羨人譖有寶貨必

負朝廷 案靈武受代康福領節度在天成四年次
年為長興元年安重誨討蜀二年賜死是康福之任
靈武甫匝歲而重誨已去朝再期而賜死矣此傳云
福鎮靈武凡三歲每歲大稔重誨奏其必負朝廷疑
有舛誤歐陽史仍是書之舊

安彥威傳彥威入司禁衛遙領鎮州節度使 案歐陽
史作遷捧聖指揮使領寧國軍指揮使

李周傳 案是書莊宗紀作李周明宗紀作李敬周蓋

本名敬周入晉後避諱去敬字是書雜采諸書未及
改歸畫一通鑑與是書同

張從訓傳為少帝娶從訓長女為妃 案宋史張從恩
傳晉祖鎮河東為少帝為娶從恩女今攷五代會要
及是書本紀俱作從訓疑宋史係傳聞之訛

舊五代史卷九十一攷證

欽定四庫全書薈要卷五千四百九十三

舊五代史卷九十二

宋門下侍郎參知政事監修國史薛居正等撰

晉書第十八

列傳七

姚顗字伯真京兆萬年人曾祖希齊湖州司功參軍祖
宏慶蘇州刺史父荆國子祭酒顗少嫺敦厚靡事容貌
任其自然流輩未之重唯兵部侍郎司空圖深器之以

女妻焉顓性仁恕多為僕妾所欺心雖察之而不能面折終身無喜怒不知錢百之為陌黍百之為銖凡家人市貨百物入增其倍出減其半不詢其由無擔石之儲心不隕獲唐末隨計入洛出遊嵩山有白衣大夫拜於路側請為童僕顓辭不納乃曰鬼神享于德君子孚于信余則鬼也將以託賢者之德通化工之信幸無辭焉昔余掌事陰府承命攝人之魂氣名氏同而其人非且富有壽筭復而歸之則筋骸已敗由是獲譴使不得為

陽生公中夏之相輔也今為謁中天之祠若以某姓名
救之神必許諾顓因為虔禱而還白衣迎于山下曰余
免其苦矣拜謝而退顓次年擢進士第梁貞明中歷校
書郎登封令右補闕禮部員外郎召入翰林累遷至中
書舍人唐莊宗平梁以例貶復州司馬歲餘牽復授左
散騎常侍歷兵吏部侍郎尚書左丞唐末帝即位講求
輔相乃書朝中清望官十餘人姓名置于瓶中清夜焚
香而挾之既而得盧文紀與顓遂拜中書侍郎平章事

制前一日嵩山白衣來謁謂顓曰公明日為相其言無
差冥數固先定矣高祖登極罷相為刑部尚書俄遷戶
部尚書天福五年冬卒年七十五贈左僕射子惟和嗣
顓疎于財而御家無術既死歛葬之資不備家人俟賻
物及鬻第方能舉喪而去士大夫愛其廉而鄙其拙

呂琦字輝山幽州安次人也祖壽瀛州景城主簿父究
滄州節度判官累至檢校右庶子劉守光攻陷滄州琦
父究被擒族之琦時年十五為吏追攝將就戮焉有趙

王者幽薊之義士也久遊于究之門下見琦臨危乃給
謂監者曰此予某之同氣也幸無濫焉監者信之即引
之俱去行一舍琦困于徒步以足病告玉負之而行逾
數百里因變姓名乞食于路乃免其禍年弱冠以家門
遇禍邈無所依乃勵志勤學多遊于汾晉唐天祐中莊
宗方開霸府翹佇賢士墨制授琦代州軍事判官秩滿
歸太原監軍使張承業重琦器量禮遇尤厚天成初拜
琦殿中侍御史遷駕部員外郎兼侍御史知雜事會河

陽帑吏竊財事發詔軍巡院鞫之時軍巡使尹訓恃勢

納賂枉直相反俄有訴冤于闕下者詔琦按之既驗其

姦乃上言請治尹訓沮而不行琦連奏不已訓知其不

免自殺于家其獄遂明蒙活者甚衆自是朝廷多倚之

公直高祖建義于太原唐末帝幸懷州趙德鈞駐軍於

團栢谷末帝以琦嘗在德鈞幕下因令賚都統使官告

以賜之且犒其軍焉及觀軍于北陸館于忻州會晉祖

降下晉安寨遣使告于近郡琦適遇其使即斬之以聞

尋率郡兵千人間道而歸高祖入洛亦弗之責止改授
秘書監而已天福中預修唐書權掌選部皆有能名焉
累遷禮部刑部戶部兵部侍郎階至金紫光祿大夫爵
至開國子琦美風儀有器概雖以剛直聞于時而內實
仁恕初高祖謀求輔相時宰臣李崧力薦琦于高祖云
可大用高祖數召琦於便殿言及當世事甚奇之方將
倚以為相忽遇疾而逝人皆惜之

梁文矩字德儀鄆州人父景秘書少監梁福王友璋好

接賓客文矩少遊其門初試太子校書轉秘書郎友璋
領鄆州奏為項城令及移鎮徐方辟為從事友璋卒改
兗州觀察判官時莊宗遣明宗襲據鄆州文矩以父母
在鄆一旦隔越不知存亡為子之情戀望如灼遂間路
歸鄆尋謁莊宗莊宗喜之授天平軍節度掌書記在明
宗幕下明宗歷汴恒二鎮皆隨府遷職天成初授右諫
議大夫知宣武軍軍州事歷御史中丞吏部侍郎禮部
尚書西都副留守判京兆府事繼政兵部尚書文矩以

嘗事霸府每懷公輔之望時高祖自外鎮入覲嘗薦於
明宗曰梁文矩早事陛下甚有勤勞未升相輔外論慙
之明宗曰久忘此人吾之過也尋有旨降命會丁外憂
而止清泰初拜太常卿高祖即位授吏部尚書改太子
少師文矩喜清靜之教聚道書數千卷企慕赤松留侯
之事而服食尤盡其善後因風痺上章請退以太子太
保致仕居洛陽久之天福八年以疾卒時年五十九贈
太子太傅

史圭常山人也其先與王武俊來于塞外因家石邑高祖曾歷鎮陽牙校父鈞假安平九門令圭好學工詩長于吏道唐光化中歷阜城饒陽尉改房子寧晉元氏樂壽博陸五邑令為寧晉日擅給驛廩以貸饑民民甚感之及為樂壽令里人為之立碑同光中任園為真定尹擢為本府司錄不應命郭崇韜領其地辟為從事及明宗代崇韜以舊職縻之明宗即位入為文昌正郎安重誨薦為河南少尹判府事尋命為樞密院直學士時圭

以受知于重誨重誨奏令圭與同列閭至俱升殿侍立
以備顧問明宗可之尋自左諫議大夫拜尚書右丞有
入相之望圭敏于吏事重誨本不知書為事剛愎每于
明宗前可否重務圭恬然終日不能剖正其事長興中
重誨既誅圭出為貝州刺史未幾罷免退歸常山由是
閉門杜絕人事雖親戚故人造者不見其面每遊別墅
則乘婦人羶車以自蔽匿人莫知其心高祖登極徵為
刑部侍郎判鹽鐵副使皆宰臣馮道之奏請也始圭在

明宗時為右丞權判銓事道在中書嘗以堂判衡銓司
所注官圭怒力爭之道亦微有不足之色至是圭首為
道所舉方愧其度量遠不及也旋改吏部侍郎分知銓
事而圭素保廉守節大著公平之譽圭前為河南少尹
日有嵩山術士遺圭石藥如斗謂圭曰服之可以延壽
然不可中輟輟則疾作矣圭後服之神爽力健深寶惜
焉清泰末圭在常山遇秘瓊之亂時貯于衣笥為賊所
劫後不復得天福中疾生胃臆之間常如火灼圭知不

濟求歸鄉里詔許之及涉河竟為藥氣所蒸卒于路歸葬石邑時年六十八

裴皞字司東系出中眷裴氏世居河東為望族皞容止端秀性卞急剛直而無隱少而好學苦心文藝雖遭亂離手不釋卷唐光化三年擢進士第釋褐授校書郎歷諫職梁初當路推其文學遷翰林學士中書舍人唐莊宗時擢為禮部侍郎後以語觸當時改太子賓客旋授兵部尚書以老致仕天福初起為工部尚書復告老以

右僕射致仕皞累知貢舉稱得士宰相馬裔孫桑維翰
皆其所取進士也後裔孫知貢舉引新進士謁皞皞喜
為詩曰詞塲最重是持衡天遣愚夫受盛名三主禮闈
年八十門生門下見門生當時榮之維翰嘗私見皞皞
不為迎送人問之皞曰我見桑公于中書庶寮也今我
見于私第門生也聞者以為允卒年八十五贈太子太
保

吳承範字表微魏州人也父瓊右金吾衛將軍累贈太

子少保承範少好學善屬文唐閔帝之鎮鄴都也聞其
才名署為賓職承範懇求隨計閔帝許之長興三年春
擢進士第及閔帝即位授左拾遺清泰二年以本官充
史館修撰與同職張昭遠等共修明宗實錄轉右補闕
依前充職高祖革命遷尚書屯田員外郎知制誥天福
三年改樞密院直學士未幾自祠部郎中知制誥召充
翰林學士正拜中書舍人賜金紫少帝嗣位遷禮部侍
郎知貢舉尋遘疾而卒年四十二贈工部尚書承範溫

厚寡言善希人旨桑維翰李崧尤重之嘗薦于高祖云
可大用承範知之持重自養雖遇盛夏而猶服襦袴加
之以純綿蓋慮有寒濕之患也然竟不獲其志其命也
夫

盧道字熙化其先范陽人也祖伯卿唐殿中侍御史父
如晦國子監丞贈戶部侍郎導少而儒雅美詞翰善談
論唐天祐初登進士第釋褐除校書郎由均州鄭鄉縣
令入為監察御史三遷職方員外郎充史館修撰改河

南縣令禮部郎中賜紫轉右司郎中兼侍御史知雜事
以病免閑居于漢上久之天成中以本官徵還拜右諫
議大夫長興末為中書舍人權知貢舉明年春潞王自
鳳翔擁大軍赴闕唐閔帝奔于衛州宰相馮道李愚集
百官于天宮寺將出迎潞王時軍衆離潰人情奔駭百
官移時未有至者導與舍人張昭遠先至馮道請導草
勸進牋導曰潞王入朝郊迎可也若勸進之事安可造
次且潞王與主上皆太后之子或廢或立當從教令安

得不稟策母后率爾而行馮道曰凡事要務實勸進其

可已乎導曰今主上蒙塵在外遽以大位勸人若潞王

守道以忠義見責未審何詞以對不如率羣臣詣宮門

取太后進止即去就善矣道未及對會京城巡檢安從

進報曰潞王至矣安得百寮無班即紛然而去是日潞

王未至馮道等止于上陽門外又令導草勸進牋導執

之如初李愚曰舍人之言是也吾輩信罪人矣導之守

正也如是天福中由禮部侍郎遷尚書右丞判吏部尚

書銓事秩滿拜吏部侍郎六年秋卒于東京時年七十

六

鄭韜光字龍府洛京清河人也曾祖細為唐宰相祖祇

德國子祭酒

新唐書宰相世系表祇德兵部尚書

贈太傅父顥河南尹贈

太師其先世居滎陽自隋唐三百餘年公卿輔相蟬聯

一門韜光唐宣宗之外孫萬壽公主之所出也生三日

賜一子出身銀章朱紱及長美容止神爽氣澈不妄喜

怒秉執名節為甲族所稱自京兆府參軍歷秘書郎集

賢校理太常博士虞部比部員外郎司門戶部郎中河
南京兆少尹太常少卿諫議大夫給事中梁貞明中懇
求休退上表漏名責授寧州司馬莊宗平梁遷工禮刑
部侍郎天成長興中歷尚書左右丞國初以戶部尚書
致仕自襁褓迨于懸車凡事十一君越七十載所仕無
官謗無私過三持使節不辱君命士無賢不肖皆恭已
接納晚年背偃時人咸曰鄭偃不迂平生交友之中無
怨隙親戚之間無愛憎恬和自如性尚平簡及致政歸

洛甚愜終焉之志天福五年秋寢疾而卒年八十贈右僕射

王權字秀山太原人積世衣冠曾祖起官至左僕射山南西道節度使冊贈太尉諡曰文懿唐史有傳祖龜浙東觀察使父莢右司員外郎權舉進士解褐授秘書省校書郎集賢校理歷左拾遺右補闕梁祖革命御史司憲崔沂表為侍御史遷兼職方員外郎知襍事歲餘召入翰林為學士在院加戶部郎中知制誥歷左諫議大

夫給事中充集賢殿學士判院事俄拜御史中丞唐莊
宗平梁以例出為隨州司馬會赦量移許州月餘入為
右庶子遷戶兵吏三侍郎尚書左丞禮部尚書判銓清
泰中權知貢舉改戶部尚書華資美級罕不由之高祖
登極轉兵部尚書天福中命權使于契丹權以前世累
為將相未嘗有奉使而稱陪臣者謂人曰我雖不才年
已耄矣豈能遠使于契丹乎違詔得罪亦所甘心由是
停任先是宰相馮道使于契丹纔回權亦自鳳翔冊禮

使回故責詞畧曰若以道路迢遙即驚閭之臺臣亦往
若以筋骸衰減即鳳翔之冊使纔回既黷憲章須從殿
黜云其實權不欲臣事契丹故堅辭之非避事以違命
也踰歲授太子少傅致仕六年秋以疾卒年七十八贈
左僕射

韓惲字子重太原晉陽人曾祖俊唐龍武大將軍祖士
則石州司馬父達代州刺史惲世仕太原昆仲為軍職
唯惲親狎儒士好為歌詩聚書數千卷乾寧中後唐莊

宗納其妹為妃初為嫡室故莊宗深禮其家而憚以文學署交城文水令入為太原少尹莊宗平定趙魏為魏州支使莊宗即位授右散騎常侍從駕至洛陽轉尚書戶部侍郎天成初改秘書監俄而馮道為丞相與憚有同幕之舊以憚性謹厚尤左右之尋遷禮部尚書丁內憂服闋授戶部尚書明宗晏駕馮道為山陵使引憚為副使清泰初以充奉之勞授檢校尚書右僕射絳州刺史踰年入為太子賓客高祖登極以憚先朝懿戚深加

禮遇除授貝州刺史時范延光有跋扈之狀憚懼其見逼遲留不敢赴任高祖不悅復授太子賓客尋改兵部尚書天福七年夏車駕在鄴憚病脚氣卒于龍興寺時年六十餘

李憚京兆人也祖褒唐黔南觀察使父昭戶部尚書憚幼而能文進士擢第解褐為校書郎集賢校理清河尉入梁歷監察御史右補闕殿中侍御史起居舍人禮部員外郎知制誥換都官郎中賜緋召入翰林為學士正

拜舍人賜金紫仍舊內職莊宗平汴洛責授懷州司馬
遇赦量移孟州入為衛尉少卿天成初復拜中書舍人
充翰林學士在職轉戶部侍郎右丞充承旨時常侍張
文寶知貢舉中書奏落進士數人仍請詔翰林學士院
作一詩一賦下工部為舉人格樣學士竇夢徵張礪輩
撰格詩格賦各一送中書宰相未以為允夢徵等請憚
為之憚笑而答曰李憚識字有數頃歲因人偶得及第
敢與後生髦俊為之標格假令今卻稱進士就春官求

試落第必矣格賦格詩不敢應詔君子多其識大體天
福中自工部尚書轉太常卿歷禮部刑部二尚書以多
病畱司于洛下不交人事開運末遇契丹入洛家事罄
空尋以疾卒年七十餘

舊五代史卷九十二

舊五代史卷九十二考證

晉列傳七姚顗傳惟兵部侍郎司空圖深器之 案歐陽史作中條山處士司空圖一見奇之据新唐書卓行傳司空圖為戶部侍郎以疾歸昭宗在華召為兵部侍郎辭不赴是圖非處士也

呂琦傳琦年十五 案厚德錄作琦年十四

有趙玉者 趙玉厚德錄作李玉

尋率郡兵千人間道而歸 案通鑑作帥州兵趣鎮州

史圭傳卒于路

案歐陽史作卒于常山

盧道傳祖伯卿

案新唐書宰相世系表卿太原少尹

伯初之子也疑原本衍伯字

父如晦

如晦新唐書世系表作知晦

郊迎可也

郊迎通鑑作班迎

是日潞王未至馮道等止于上陽門外又令導草勸進

賤

案歐陽史作潞王止于上陽門外道又促導草

賤與是書異通鑑作潞王未至三相息于上陽門外

與是書同

鄭韜光傳父顥

案新唐書世系表顥字養正疑顥字

是頤字之訛

王權傳先是宰相馮道使于契丹纔回權亦自鳳翔冊

禮使回案通鑑考異引周世宗實錄馮道傳云契

丹遣使加徽號于晉祖晉亦獻徽號于契丹始命兵

部尚書王權銜其命權辭以老病晉祖謂馮道曰此

行非卿不可道無難色据此傳馮道自契丹使回始

命王權奉使道亦未嘗再使契丹也與周實錄異

舊五代史卷九十二 攷證

欽定四庫全書薈要卷五千四百九十四

舊五代史卷九十三

宋門下侍郎參知政事監修國史薛居正等撰

晉書第十九

列傳八

盧質字子徵河南人也曾祖偲唐太原府祁縣尉累贈
右僕射祖衍唐刑部侍郎太子賓客累贈太保父望唐
尚書司勳郎中累贈太子少傅質幼聰慧善屬文年十

六陝帥王重盈奏授芮城令能以色養又為同州澄城令從私便也秩滿改秘書郎丁母憂歸河南故里天祐三年北遊太原時李襲吉在武皇幕府以女妻之武皇憐其才承制授檢校兵部郎中充河東節度掌書記賜緋魚袋武皇厭代其弟克寧握兵柄有嗣襲之望質與張承業等密謀同立莊宗為嗣有翊贊之功及莊宗四征質皆從行十六年轉節度判官檢校禮部尚書十九年莊宗將即帝位命為大禮使累加至銀青光祿大夫

檢校右僕射二十年授行臺禮部尚書莊宗既登極欲相之質性疎逸不喜居高位固辭獲免尋以本官兼太原尹充北京留守事未赴任改戶部尚書知制誥充翰林學士承旨同光元年冬從平大梁權判租庸事踰月隨駕都洛旋受詔權知汴州軍府事時孔謙握利權志在聚斂累移文于汴配民放絲質堅論之事雖不行時論賞之俄又改金紫光祿大夫兵部尚書知制誥翰林學士承旨仍賜論思匡佐功臣會覆試進士質以後從

諫則聖為賦題以堯舜禹湯傾心求過為韻舊例賦韻

四平四側質所出韻乃五平三側由是大為識者所謂

天成元年制授特進檢校司空同州節度使時宰相馮

道以詩餞別其警句云視草北來唐學士擁旄西去漢

將軍儒者榮之明年改賜耀忠匡定保節功臣就加檢

校司徒三年入拜兵部尚書判太僕卿事四年進封開

國公長興二年授檢校太保河陽節度使未幾移鎮滄

州入為右僕射及秦王得罪奉詔權知河南府事應順

初遷檢校太傅正拜河南尹後改太子少師清泰末復

為右僕射高祖登極質以微恙分司洛下少帝嗣位拜

太子太保天福七年秋卒於洛陽年七十六累贈太子

太師謚曰文忠

五代會要漢乾祐元年九月其子尚書兵部員外郎盧瓊上章請謚下太常議

謚曰文忠

子十一人惟第六子瓊仕至省郎餘厯州縣焉

李專美字翊商京兆萬年人也曾祖隋光祿卿祖正範尚

書庫部郎中專美少篤學文以父樞唐昭宗時常應進

士舉為覆試所落不許再入專美心愧之由是不遊文

塲偽梁貞明中河南尹張全義以專美名族之後奏為
陸渾尉秩滿改舞陽令專美性廉謹大著政聲後唐天
成中安邑摧鹽使李肅辟為推官時唐末帝鎮河中見
其敦雅心重之末帝一日曾召肅讌於衙署專美亦預
坐末帝謂肅曰某夜來夢主上召去與宋王同剃却頭
何也坐客都無對者專美屏人謂曰將來必為嗣主由
是愈重焉末帝留守長安奏為從事及移鎮鳳翔遷為
記室末帝即位除尚書庫部郎中賜金紫充樞密院直

學士初末帝起自鳳翔大許諸軍厚賞洎至洛陽閱內庫金帛不過二三萬尋又配率京城戶民雖行捶楚亦所獲無幾末帝憂之會專美宿于禁中末帝召而讓之曰卿士人子弟常言有才術今致我至此不能度運以濟時事留才術何施也專美惶恐待罪良久奏曰臣才力駑劣屬當興運陛下猥垂錄任無以裨益聖朝然府藏空竭軍賞不給非臣之罪也臣思明宗棄代之際是時府庫濫賞已竭繼以鄂王臨朝紀綱大壞縱有無限

之財賦不能滿驕軍谿壑之心所以陛下孤立岐陽而得天下臣以為國之存亡不專在行賞須刑政立于上恥格行于下賞當功罰當罪則近于理道也若陛下不改覆車之轍以賞無賴之軍徒困蒸民存亡未可知也今宜取見在財賦以給之不必踐前言而希苟悅未帝然之及其行賞雖不愜于軍士然洛陽戶民獲免鞭笞之苦由專美之敷揚也尋轉給事中明年遷兵部侍郎端明殿學士未幾改檢校尚書右僕射守秘書監充宣

徽北院使高祖入洛以例除名三年復授衛尉少卿繼
遷鴻臚大理卿開運中以病卒時年六十二專美之遠
祖本出姑臧大房與清河小房崔氏北祖第二房盧氏
昭國鄭氏為四望族皆不才行相尚不以軒冕為貴
雖布衣徒步視公卿蔑如也男女婚嫁不雜他姓欲聘
其族厚贈金帛始許焉唐太宗曾降詔以戒其弊風終
莫能改其間有未達者必曰姓崔盧李鄭了餘復何求
耶其達者則邈在天表賈若千里人罕造其門浮薄自

大皆此類也唯專美未嘗以氏族形于口吻見寒素士大夫恒恂恂如也人以此多之專美職岐下曾夢具裳簡立嵩山之頂及為端明殿學士學士李崧同列而班在其上因以所夢告崧且言某非德非勲安可久居此位處吾子之首乎因懇求他官尋移宣徽使崧深德之及高祖臨朝崧為樞密使與桑維翰同列維翰與專美亦有舊乃協力以奏之遂復朝序位至九卿專美曾使閩中遇風水漂至兩浙踰歲無恙而還至是善終人以

為神道福謙之所至也

盧詹字楚良京兆長安人也唐天祐中為河中從事莊
宗即位擢為員外郎知制誥遷中書舍人天成中拜禮
部侍郎知貢舉歷御史中丞兵部侍郎尚書左丞工部
尚書詹性剛直議論不避權貴執政者常惡之天福初
拜禮部尚書分司洛下與右僕射盧質散騎常侍盧重
俱在西都數相過從三人俱嗜酒好遊山水塔廟林亭
花竹之地無不同往酣飲為樂人無間然洛中朝士目

為三盧會常委順性命不營財利開運初卒于洛陽詹家無長物喪具不給少帝聞之賜布帛百段粟麥百斛方能裹其葬事贈太子少保

崔悅字子文博陵安平人累世冠冕曾祖元受舉進士直史館祖銖安濮二州刺史父涿刑部郎中悅少好學梁貞明三年舉進士甲科為開封尹王瓚從事悅性至孝父涿有疾謂親友曰死生有命無醫為也悅侍之衣不解帶有賓至必拜泣告于門外請方便勸其進藥涿

終莫之從及丁憂哀毀過制明宗朝授監察御史不應
命踰年詔再下乃就列焉累遷都官郎中翰林學士天
福初以戶部侍郎為學士承旨嘗草制為宰相桑維翰
所改稅以唐故事學士草制有所改者當罷職乃引經
據爭維翰不能詰命權知二年貢舉時有進士孔英者
素有醜行為當時所惡稅受命往見維翰維翰語素簡
謂稅曰孔英來矣稅不論其意以謂維翰以孔英為言
乃考英及第物議大以為非遂罷學士拜尚書左丞遷

太常卿後以風痺改太子賓客分司西京卒年六十八
杓平生所著文章碑誄制詔甚多人有借本傳寫者則
曰有前賢有來者奚用此為凡受託而作者必親札致
之即焚其藁懼泄人之假手也杓笑不至哂怒不至詈
接新進後生未嘗無誨焉羣居公會端坐寡言嘗云非
止致人愛憎且或干人祖禰之諱指命僕役亦用禮節
盛暑祁寒不使冒犯嘗自話於知友云某少時夢二人
前引行路一人計地里曰一舍矣可以止一人曰此君

當更進三十有八里復行如所言二人皆止之俄而驚覺枕常識是夢以為定命之限故六十七請退明年果終焉兄掄有隱德好釋氏閑居滑州嘗欲訪人于白馬津比及臨岸歎曰波勢洶湧如此安可濟乎乃止後徵拜左拾遺辭疾不赴

薛融汾州平遙人性純和以儒學為業初從雲州帥李存璋為幕職唐莊宗平河南歷鄆徐二鎮從事明宗初授華州節度判官長興四年入為右補闕直弘文館歲

餘改河東觀察判官會高祖鎮太原遂居于幕府清泰
末高祖將舉義延賓席而歷問之次及融對曰融本儒
生祇曾讀三五卷書至于軍旅之事進退存亡之機未
之學也座中聳然及登極遷尚書吏部郎中兼侍御史
知雜事天福二年自左諫議大夫遷中書舍人自以文
學非優不敢拜命復為諫議時詔修西京大內融以鄴
下用兵國用不足上䟽復罷之

通鑑薛融諫曰今宮室雖經焚毀猶侈于帝堯

之茅茨所費雖寡猶多于漢文之露臺况魏城未下公私用窘誠非陛下修宮館之日俟海內平寧修之未晚

優詔嘉許俄轉御史中丞秩滿改尚書右丞分司西都
天福六年以疾卒年六十餘

曹國珍字彥輔幽州固安人也曾祖藹祖蟾父絢代襲
儒素國珍少值燕薊亂離因落髮被縑客于河西延州
高萬興兄弟皆好文辭為從事國珍常以文章自許求
貢禮闈且掌書奏暮年入為左拾遺累遷至尚書郎每
與人交傾財無吝性頗剛僻經藝史學非其所長好自
矜銜多上章疏文字差誤數數有之為縉紳所誚高祖

在藩時嘗通私謁以兄事之及即位國珍自比于嚴陵

上表叙舊由是自吏部郎中拜左諫議大夫給事中

歐陽

史張彥澤傳國珍與御史中丞王易簡率三院御史詣閣門連疏論張彥澤不報

又求為御史

中丞時宰政不復為請國珍銜之李崧之母薨遣諸弟

護喪歸葬深州崧既起復乃出北郊路隅設奠公卿大

夫皆送喪而出國珍固爭不行衆咸推其讜直高祖晏

駕朝廷以宰臣馮道為山陵使及靈輜既發國珍上疏

言馮道既為山陵使不得復入都城請除外佐以桑維

翰入輔李崧請罷相位俾持喪制少帝覽奏以所言侵越出為陝州行軍司馬至任悒快遘疾而卒

張仁愿字善政開封陳留人也祖晟唐右武衛大將軍父存敬梁河中節度觀察留後累贈中書令梁書有傳仁愿梁貞明初以勲臣之子起家為衛尉寺主簿改著作佐郎左贊善大夫賜緋魚袋唐同光初遷大理正天成元年自將作少監轉大理少卿長興中歷昭武歸德兩鎮節度判官四年復入為大理少卿清泰中除殿中

監天福五年拜大理卿八年轉光祿卿仁愿性溫雅明
法書累居詳刑之地議誠疑獄號為稱職兄仁頴梁朝
仕至諸衛將軍中年以風恙廢于家凡十餘年仁愿事
之出告反面如嚴父焉士大夫推為孝友仁頴善理家
勤而且約婦女衣不曳地什物多歷年所如新市焉仁
愿開運元年再為大理卿時隰州刺史王澈犯賊朝廷
以澈功臣之後欲宥之仁愿累執奏不移竟遣伏法議
者賞之開運二年以疾卒年五十一贈秘書監

趙熙字績臣唐宰相齊國公光逢之猶子也起家授秘

書省校書郎唐天成中累遷至起居郎數上章言事以

稱旨尋除南省正郎天福中承詔與張昭遠等修唐史

竟集其功開運中自兵部郎中授右諫議大夫賞筆削

之功也及契丹入汴遣使於晉州率配豪民錢幣以實

行橐始授命之日條制甚嚴熙出於衣冠之族性素輕

急既畏契丹峻法乃窮力搜索人甚苦之及晉之三軍

殺副使駱從朗

通鑑契丹以節度使駱從朗知晉州事大將藥可儔殺從朗

知百姓相

率持杖害熙于館舍識者傷之

李遐兗州人也少為儒有節操歷數鎮從事及升朝累遷尚書庫部員外郎高祖即位以皇子重乂保釐洛邑知遐強幹有守除為西京留守判官使之佐理復重其廉勤兼委監西京左藏庫會張從賓作亂使人輦取繒帛以賞羣逆遐曰不奉詔書安敢承命遂為其下所害高祖聞而歎息賻贈加等仍贈右諫議大夫其母田氏封京兆郡太君仍給遐所食月俸終母餘年其子俟服

闕與官後又遣兗州節度使李從溫就其舊業賜牲幣
綿帛等物以旌其忠也

尹玉羽京兆長安人唐天復中隨計京師甚有文稱會
有苴杖之喪累歲羸疾冬不釋管履暮不變倚廬制闕
隱居杜門無仕宦之意梁貞明中劉鄩辟為保大軍節
度判官厯雍汴滑兗從事

以下有闕文考宋黎持移石
經記石經舊在務本坊自天

祐中韓建築新城而石經委棄于野至朱梁時劉鄩守
長安從幕吏尹玉羽之請輦入城中置于北地即唐尚
書省之
四隅也唐清泰中為光祿少卿退歸秦中以林泉詩酒

自樂自號自然先生宰臣張延朗手書而召高卧不從
謂人曰庶孽代宗不可仕也及高宗入雒即受詔而來
以所著自然經五卷貢之且告其老即日璽書褒美頒
其器幣授少府監致仕月給俸錢及冬春二時服天福
中卒有武庫集五十卷行于世

鄭雲叟本名遨雲叟其字也以唐明宗廟諱故世傳其
字焉本南燕人也少好學耿介不屈唐昭宗朝嘗應進
士不第因欲攜妻子隱于林壑其妻非之不肯行雲叟

乃薄游諸郡獲數百緡以贍其家辭訣而去尋入少室山著擬峰詩三十六章以導其趣人多傳之後妻以書達意勸其還家雲叟未嘗一覽悉投于火其絕累如此俄聞西岳有五粒松淪脂千年能去三尸因居于華陰與李道殷羅隱之友善時人目為三高士道殷有釣魚之術鉤而不餌又能化易金石無所不至雲叟恒目覩其事信而不求雲叟與梁室權臣李振善振欲祿之拒而不諾及振南遷雲叟千里徒步以省之識者高焉後

妻兒繼謝每聞凶計一哭而止時惟青衿二童子一琴
一鶴從其遊處好棋塞之戲遇同侶則以晝繼夜雖寒
風大雪臨簷對局手足皸裂亦無倦焉唐天成中召拜
左拾遺不起與羅隱之朝夕遊處隱之以藥術取利雲
叟以山田自給俱好酒能詩善長嘯有大瓢云可辟寒
暑置酒于其中經時味不壞日攜就花木水石之間一
酌一詠嘗因酒酣聯句鄭曰一壺天上有名物兩箇世
間無事人羅曰醉却隱之雲外叟不知何處是天真高

祖即位聞其名遣使致書致禮徵為右諫議大夫雲叟
稱疾不起上表陳謝高祖覽表嘉之賜近臣傳觀尋賜
號逍遙先生以諫議大夫致仕月給俸祿雲叟好酒嘗
為詠酒詩千二百言海內好名者書于縑緗以為贈貺
其為時望所重也如此天福末以壽終時年七十四有
文集二十卷行于世

史臣曰自古攀龍鱗附鳳翼坐達于雲衢者豈獨豐沛
之士哉苟懷才抱器適會興王亦可以取貴于一時如

盧質而下數君子是也至如國珍之謹直仁愿之友悌
趙李二子沒于王事皆無忝于士林矣惟玉羽之貞退
雲叟之肥遯足可以挽奔競之風激高尚之節也

舊五代史卷九十三

舊五代史卷九十三考證

晉列傳八盧質傳判太僕卿事 案歐陽史作判太常

卿事

李專美傳曾祖隋光祿卿 案新唐宰相世系表作隋

秘書監

除尚書庫部郎中 案歐陽史作比部郎中

崔稅傳曾祖元受舉進士直史館 案新唐書世系表

元受直史館高陵尉

兄綸 綸新唐書世系表作榆

薛融傳年六十餘 案歐陽史作年六十

鄭雲叟傳本南燕人也 案歐陽史作滑州白馬人

尋入少室山 案歐陽史作入少室為道士

舊五代史卷九十三 考證



總校官編修臣朱 鈐

校對官助教臣李 巖

謄錄監生臣謝 雲

欽定四庫全書叢要

史部

舊五代史卷九十八

四至



詳校官編修臣王天祿

欽定四庫全書薈要卷五千四百九十五

舊五代史卷九十四

宋門下侍郎參知政事監守國史薛居正等撰

書第二十
列傳九

裴從簡陳州人也世以屠羊為業力敵數人善用槊初
事後唐莊宗為小校每遇攻城召人為梯頭從簡多應
募焉莊宗為其勇擢領帳前親衛兼步軍都指揮使一

日莊宗領大軍與梁軍對陣登高邱而坐敵人有執大
幟揚其武者莊宗指之謂左右曰猛士也從簡曰臣為
大王取之莊宗慮其不捷不許從簡退乃潛領十數騎
挺身而入奪幟以歸萬衆鼓譟莊宗壯之錫賚甚厚又
嘗中箭而鏃入于骨使醫工出之以刃鑿骨恐其痛也
良久未能搖動從簡嗔目謂曰何不沈鑿洎出之左右
無不惻然從簡顏色自若其勇壯皆此類也從簡所為
多不法莊宗以其戰鬪多捷常屈法赦之賜姓名曰紹

瓊後加竭誠匡國功臣累官至金紫光祿大夫檢校太保景州刺史厯洺州團練使及梁平典蔡州同光四年授許州節度使會莊宗晏駕未及赴鎮而止明宗登極例復本姓厯麟汝汾金四州刺史

北夢瑣言云明宗尤惡貪貨面戒汝州刺

史長從簡為其貪暴應順初舉軍伐鳳翔從簡亦預其行會軍變

乃東還道遇張廷蘊為廷蘊所執送于末帝末帝數之曰人皆歸我爾何背我而去也從簡曰事主不敢二心今日死生惟命末帝釋之清泰二年授潁州團練使高

祖舉義末帝將議親征詔赴闕充副招討使隨駕至孟

津除河陽節度使及趙延壽軍敗斷浮橋歸洛留從簡

守河陽高祖自北而至從簡察軍情離散遂渡河迎謁

高祖天福元年十二月授許州節度使改賜推忠佐連

保國功臣二年秋移鎮徐州三年加開府儀同三司檢

校太尉進封開國公食邑至一千五百戶受代歸闕授

左金吾衛上將軍從簡性忌刻而多疑歷州鎮凡十餘

所在豎棘于公署纔通人行左右稍違足而忤即加鞭

咎或至殺害其意不可測吏人皆側行其煩苛暴虐為
武臣之最六年秋隨駕幸鄴都遇疾請告尋卒于鄉里
年六十五贈太傅

潘環字楚奇洛陽人也父景厚以環貴授左監門上將
軍致仕環少以負販為業始事梁邢州節度使閻寶為
帳中親校及莊宗定魏博移兵攻邢寶遣環間道馳奏
于梁梁末帝用為左堅銳夾馬都虞候累遷左雄威指
揮使時梁人與莊宗對壘于河上環每預戰先登陷敗

金瘡編體

玉堂閒談云潘環常中流矢于面骨銜其鏃故負重傷醫療至經年其鏃自出其瘡成漏

終身不痊

莊宗知其名及平梁命典禁軍同光中從明宗北

禦契丹鄴軍之亂從明宗入洛天成初授棣州刺史會
定州王都反朝廷攻之以環為行營右廂步軍都指揮
使賊平改易州刺史北直沁邊都部署後移刺慶州受
代歸闕明宗召對顧侍臣曰此人勇敢少能偕者尋除
宿州團練使清泰中移耀州天福中預定范延光授齊
州防禦使四年升金州為節鎮以環為節度使久之入

為左神武統軍開運初契丹入寇王師北征以環為北

面行營步軍左廂排陣使預破契丹于陽城軍廻授瀘

州節度使累官至檢校太傅三年罷鎮歸闕俄受詔洛

京巡檢其年冬戎王入汴署留晞為西京留守環乞罷

巡警閑居洛陽遇河陽軍亂晞出奔未幾蕃將高牟翰

以兵援晞入于洛慮環有變乃害之盡取其家財

通鑑云晞

疑潘稱其衆逐已使牟翰殺之

漢高祖至京贈太尉環歷六部兩鎮所

至以聚歛為務在宿州時有牙將因微遇見怒環紹言

笞之牙校因托一尼嘗熟于環者獻白金兩錠尼詣環
白牙校餉鍬脚兩枚求免其責環曰鍬本幾脚尼曰三
脚環復曰今兩脚能成鍬乎尼則以三數致之當時號
環為潘鍬脚

方太字伯宗青州千乘人也少隸本軍為小校嘗戍登
州刦海客事洩刺史淳于晏匿之遇赦免事定州節度
使楊光遠光遠領兵赴晉陽本州軍亂太與馬萬盧順
密等擒之使太縛送至闕尋從杜重威破張從賓于汜

水以功除趙州刺史從楊光遠平范延光于鄴移刺萊
州遷安州防禦使從少帝幸澶州與契丹戰于戚城中
數創改鳳州防禦使行至中途遷河陽留後移邢州留
後契丹入汴命遙頌洋州節度使充洛京廵檢與前洺
州團練使李瓊俱至鄭州其屯駐兵士迫請太在城廵
川以備外盜號為鄭王時有嵩山賊帥張遇頌衆萬餘
于僧衆得梁朝故嗣密王朱乙遂推為天子取嵩山神
冠冕之服以衣之張遇以其衆攻鄭州太與李瓊擊之

賊衆敗走瓊中流矢而死太乃括率郡中財物以賞軍

士因誘之欲同西去其衆不從太乃潛奔于洛陽

通鑑云成

兵既失太反潛太子契丹云脅我為亂太遣子師朗自訴于契丹契丹殺之

及劉晞南走許

州太殺晞牙校李暉入河南府行留守事既而嵩山賊

帥張遇毅嗣密王傳首于太懸于洛市又有伊闕賊帥

自稱天子領衆萬餘將入洛城集郊壇之上太率兵數

百人逆擊破之賊衆遂潰

通鑑考異引實錄方太傅云劉禧走許州復有潁陽妖巫

姓朱號嗣密王誓衆于洛南郊天壇號萬餘人太帥部曲與朝士輩虛張旗幟一舉而逐之洛師遂安

河

陽武行德遣使召太詐言欲推之為帥尋為行德所害

何建其先迴鶻人也代居雲朔間祖慶父懷福俱事後

唐武皇為小校建少以謹厚隸于高祖帳下以掌廐為

役及即位累典禁軍

九國志云重建初事晉祖為奉德馬軍都指揮使

遙頌驩

睦二郡天福中自曹州刺史遷延州兵馬留後尋正授

旄鉞

九國志云延州節度使丁審琪殘暴貪冒蕃部苦之重建以所部兵攻其城審琪遁去晉祖即以重

建權節度兵馬留後下車諭以威福邊民安堵就拜彰武軍節度使數年之間厯涇鄜貝

澶孟五鎮節度使

九國志云皆以廉儉簡易稱

累官至檢校太傅開

運三年移鎮秦州是冬契丹入汴戎王遣人齎詔以賜
建建憤然謂將吏曰吾事石氏二主累擁戎旃人臣之
榮亦已極矣今日不能率兵赴難豈可受制于契丹乎
即遣使齎表與其地送款于蜀孟昶待之甚厚偽加同
平章事依前秦州節度使九國志云時固鎮與鳳州未平重建悉經畧討平之歲
餘移閬州保寧軍節度使九國志云昶大舉兵北伐遣張虔釗出大散關以重建為
招討使由隴州路加偽官至中書令後卒于蜀
以進師無功而還
張廷蘊字德樞開封襄邑人也祖立贈驍衛將軍父及

贈光祿大夫廷蘊少勇捷始隸宣武軍為伍長唐天福中奔太原武皇收于帳下為小校及莊宗救上黨戰栢鄉攻薊門下邢魏皆從之後戰于莘縣及胡柳陂繼為流矢所中金瘡之痕盈于面首莊宗寵之統御營黃甲軍常在左右累加檢校兵部尚書帳前步軍都虞候充諸軍濠寨使同光初從明宗收汶陽加檢校尚書右僕射充魏博三城巡檢使時皇后劉氏在鄴每縱其下擾人廷蘊多斬之聞者壯焉梁平承詔入覲改帳前都指

揮使兼左右羽林都虞候會潞州李繼儔故將楊立嬰
城叛詔遣明宗為招討使元行欽為都部署廷蘊為前
鋒軍至上黨日己暝矣憇軍方定廷蘊首率勁兵百餘
輩踰洹坎城而上守陴者不能禦尋斬關延諸軍入焉
明宗行欽達明而始至其城已下明宗甚懷之軍還改
左右羽林都指揮使加檢校司空行申州刺史同光末
從皇子魏王繼岌伐蜀授行營中軍都指揮使蜀平明
宗嗣位遷懷州刺史賜竭忠建策興復功臣加檢校司

徙旋移金州防禦使加檢校太保繼授潁州團練使公
淮招安使應順中轉隴州防禦使清泰中進封清河郡
公高祖即位入為右龍武統軍遷絳州防禦使少帝嗣
位領左軍衛上將軍加特進開運三年冬以老病求歸
于宋城明年卒于家時年六十九廷蘊所識不過數字
而性重文士下汶陽日首獲鄆帥戴思遠判官趙鳳訊
之曰爾狀貌必儒人也勿隱其情鳳具言之尋引薦于
明宗明宗令送赴行臺尋除鳳翰林學士及鳳入相頗

與廷蘊相洽數言于近臣安重誨重誨亦以廷蘊苦戰
出于諸將之右力保薦之明宗以廷蘊取潞之日不能
讓功于己故恒蓄宿忿至使廷蘊位竟不至方鎮亦命
矣夫廷蘊歷七郡家無餘積年老耄期終于牖下良可
嘉也長子光被歷通事舍人

郭延魯字德興沁州綿上人也父饒後唐武皇時以軍
功嘗為本郡守凡九年有遺愛焉延魯少有勇善用槊
莊宗以舊將之子擢為保衛軍使頻戍塞下捍契丹有

功及即位賜協謀定亂功臣加檢校兵部尚書右神武都指揮都知兵馬使天成中汴州朱守殷叛延魯從車駕東幸至其地坎壘先登守殷平以功授汴州步軍都指揮使加檢校尚書左僕射長興中累加檢校司徒歷天雄軍北京馬步軍都校遙領梧州刺史清泰中遷復州刺史正俸之外未嘗歛貸庶事就理一郡賴焉秩滿百姓上章舉留朝廷嘉之高祖即位遷單州刺史加檢校太保賜輸誠奉義忠烈功臣到任踰月以病卒于理

所時年四十七詔贈太傅

郭金海本突厥之族少侍昭儀節度使李嗣昭常從征
伐金海好酒所為不法自潞州過山東入邢洺界為劫
盜嗣昭雖知之然惜其拳勇每優容之天祐中累職至
昭義親騎指揮使同光二年遷本道馬軍都指揮使天
成初入為捧聖指揮使長興三年改護聖都虞候天福
二年從王師討范延光于魏州以功轉本軍都指揮使
領黃州刺史高祖幸鄴宣金海領部兵巡檢東京其年

十一月安從進謀犯闕金海爲襄州道行營先鋒都指揮使與李建崇等同于唐州湖陽遇從進軍萬餘人金海以一旅之衆突擊大敗之策勲授檢校太保商州刺史

史俄移慶州秩滿歸闕途中遇疾而卒年六十一

洛陽緡紳

舊聞記從進與金海相遇于花山金海著將善用槍時罕與敵拳勇過人喜戰闕欲立奇功兩陣相去數里從進素管騎兵金海久在麾下從進亦待之素厚乃躍馬引數百騎乘高去金海陣數百步厲聲呼郭金海金海獨鞭馬出于陣數十步免胄側身高聲自稱曰金海從進又前行數十步勞之曰金海安否我素待你厚畧不知恩今日敢來共我相殺金海應聲答曰官家好看大王負大王甚事大王今日反金海舊事大王乞與大王

一剪地大王回去若不去噉取金海槍言訖援槍鞭馬疾趨其陣從進懼躍馬而進師遂相接大為金馬所敗焦繼勳押陣奏到晉祖大喜賞賜有差從進自此喪氣嬰城自固王師為連城重塹以守之月餘王師攻城城上矢下如雨王師被傷甚衆是日金海為飛矢集身扶傷歸營明日從進用計汙金海欲使朝廷疑之以金瓶貯酒金合盛藥以索懸之城上呼郭金海金海知之力疾赴創而往城上勞金海曰大王知你中箭創甚賜爾金瓶金合酒與風藥金海目不知書惟利是貪取瓶與合歸營且不聞於元戎元戎等疑之乃駢駟秦晉祖以花山之功不加罪城下就除金州團練并其兵于他部金海之任居常悒悒不樂至于捐館

劉處讓字德謙滄州人也祖信累贈太子少保父瑜累贈太子少師梁貞明初張萬進帥兗州處讓事之為親

校萬進據城叛梁遣大將劉鄩討之時唐莊宗屯軍于

麻口渡萬進密遣處讓乞師于莊宗莊宗未即應之乃

于軍門截耳曰主帥急難使我告援苟不得請死亦何

避莊宗義之將舉兵渡河俄聞城陷乃止因以墨制授

處讓行臺左驍衛將軍俄改客省副使梁平加檢校兵

部尚書累將命稱旨天成初轉檢校尚書右僕射依前

充職歲餘遷引進使長興三年轉檢校司空左威衛大

將軍其職如故四年西川孟知祥跋扈不通朝貢朝廷

方議懷柔乃遣處讓為官告國信使復命轉檢校司徒
應順初授忻州刺史檢校太保充西北面都計度使備
北寇也清泰二年入為左驍衛大將軍三年夏魏博屯
將張令昭逐其帥以城叛朝廷命范延光領兵討之以
處讓為河北都轉運使及高祖舉義于太原處讓從至
洛陽乃授宣徽北院使天福二年轉左監門衛上將軍
充宣徽南院使范延光之據鄴也高祖命宣武軍節度
使楊光遠領兵討之時處讓奉詔與光遠同叅議軍政

會張從賓作亂于河陽處讓自黎陽分兵討襲從賓平復與楊光遠同攻鄴城四年冬范延光將謀納款尚或遲留處讓首入其城以禍福諭之延光乃降以功加檢校太傅先是桑維翰李崧兼充樞密使處讓以莊宗己來樞密使罕有宰臣兼者因盟心以覬其位及楊光遠討伐鄴城軍機大事高祖每命處讓宣達時光遠恃軍權多有越體論奏高祖依違而已光遠嫌之頻與處讓宴語及之處讓訴曰非聖旨也皆出維翰等意及楊光

遠入朝遂于高祖前面言執政之失高祖知其故不得
已乃罷維翰等以處讓為樞密使時處讓每有敷奏高
祖多不稱旨會處讓丁繼母憂高祖因罷樞密使其
本院庶事竝委宰臣分判處讓居喪期年起復授彰德
軍節度使澶衛等州觀察處置等使處讓勤于公務孜
孜求理馭吏民不致苛察人甚便之高祖幸鄴都處讓
竭家財貢奉至于薪炭膏沐之費悉供億馬六年除右
金吾衛上將軍處讓自以嘗經重任又歷方鎮謂其入

朝必當要職一旦除授金吾有所不足少帝即位之初處讓與宰臣言有協翼之論覃恩之際又未擢用一日至中書宰臣馮道趙瑩李崧和凝在列處讓因酒酣厯詆諸相道寔而不答月餘稱病八年從駕歸忤寄居于封禪寺遇疾而卒年六十三贈太尉再贈太師子保勲仕皇朝位至省郎

李瓊字隱光滄州饒安人也少籍本軍為騎士莊宗平河朔隸明宗麾下漸升為小校同光二年明宗受詔以

本部兵送糧入薊門時高祖從行至涿州與敵相遇高祖陷于圍中瓊顧諸軍已退密遣高祖截衣指東而遁至劉李河為敵所襲瓊浮水先至南岸高祖至河中馬倒順流而下瓊以所執長矛援高祖出之又以所跨馬奉高祖瓊徒步護之奔十餘里乃入涿州高祖薦于明宗明宗賞之尋超授軍職同光末明宗討趙在禮于鄴鄴軍既變明宗退至魏縣遣高祖以騎士三百疾趨卞州時莊宗遣騎將西向鄴守其城高祖憂之使瓊以勁

兵突封邱門而入高祖踵之鄴尋歸命浚邳遂定及高祖領陝州秦補雲騎指揮使俄改侍衛牙隊指揮使長興中從高祖討東川至劔州使瓊以部下兵破賊軍數千身中重創軍還改龍武指揮使清泰中屯雲州累擒獲契丹人馬以功改右捧聖軍指揮使唐末帝以瓊元事高祖乃自寨下移授單州馬步軍副指揮使高祖即位補護聖都指揮使又念疇昔輟馬導護之力前後所賜金帛甚厚但未升爵位瓊亦鬱鬱然久之領橫州刺

史五年出典申州微有政聲少帝嗣位入為殿前散員
都指揮使遙領雷州俄遷隸州刺史遇楊光遠以青州
叛自統本部兵攻其城且以書誘瓊瓊因拒之以書上
進朝廷嘉之開運二年改洛川團練使累官至加檢校
司空三年授護聖右廂都指揮使領岳州團練使時洛
州吏民列狀保留朝廷不允及杜重威降敵改授瓊威
州刺史行及鄭州遇羣盜攻郡與方太禦賊中流矢而
卒年六十五

高漢筠字時英齊州厯山人也曾祖詣嘗為是邑令故家焉漢筠少好書傳嘗詣長白山講肄會唐末齊魯交兵梁氏方霸乃擲筆謁焉尋納于軍門未幾出為衛州牙校唐天祐中莊宗入魏分兵諭其屬郡時漢筠以利病說衛之牧守俾送款于莊宗以漢筠為功尋移洛州都校其後改常山為北京以漢筠為皇城使加檢校兵部尚書左驍衛將軍同正明宗即位除成德軍節度副使俄以荊門用軍促詔漢筠移倅襄州權知軍州事長

興中厯曹毫二州刺史秩滿加檢校司徒行左金吾衛

大將軍清泰中高祖建義于河東唐末帝遣晉昌節度

使張敬達率師圍太原委漢筠巡撫其郡及敬達遇害

節度副使田承肇率部兵攻漢筠于府署漢筠乃啓闕

延承肇謂曰僕與子俱承朝寄而相迫何甚承肇曰我

欲扶公為節度使漢筠曰老夫耄矣不敢首為亂階死

生繫子籌之承肇目左右令前諸軍投刃于地曰高金

吾累朝宿德不可枉殺承肇以衆意難拒遂謝云與公

戲耳漢筠促騎以還高祖入洛飛詔徵之遇諸途乃入
覲尋遷左驍尉大將軍內客省使天福三年正月遘疾
終東京之私第時年六十六漢筠性寬厚儀容偉如也
雖厯戎職未嘗有非法之言出于口吻多慕士大夫所
為復以清白自負在襄陽有孽吏常課外獻白金二十
鎰漢筠曰非多納楚楚則刻削闔闔吾有正俸此何用
焉因戒其主者不復然其白金皆以狀上進有詔嘉之
及莅濟陰部民安之四邑飯僧凡有萬八千人在亳州

三年歲以已俸百千代納逋租斯亦近代之良二千石也長子貞文仕皇朝為開封少尹卒

孫彥韜字德光汴州浚儀人也少以勇力應募從軍梁祖之兼領四鎮擢彥韜于行間厯諸軍偏校及唐莊宗與梁軍對壘于河上彥韜知梁運將季乃間行渡河北歸莊宗莊宗嘉而納之授親從右廂指揮使及莊宗平梁出為晉州長步都校加檢校兵部尚書天成初遷綿州刺史檢校尚書左僕射至郡踰年以考課見稱就加

檢校司空長興清泰中厯密沂濮三州刺史累官至檢校太保賜竭忠建策興復功臣高祖即位復授密州刺史尋卒于任年六十四彥韜出于軍旅植性和厚理綿州日甚著綏懷之譽故有賞典旌焉在濮陽屬清泰末羣寇入郡郡人大擾彥韜率帳下百人一呼破之人皆感之但不能守廉養正以終令譽長興中罷密州赴闕苞苴甚厚起甲第于洛陽踰月而成華堂廣廡亞王公之家見者嗤之故淹翔五郡位不及廉察抑有由也

王傳拯吳江人也父綰偽虔州節度使傳拯初事楊溥
為黑雲石廂都指揮使領本軍戍海州唐長興元年傳
拯殺海州刺史陳宣焚州城以所部兵五千人來歸明
宗喜而納之授金紫光祿大夫檢校司徒曹州刺史尋
移濮州清泰中遷貝州防禦使秩滿有代會范延光叛
以兵要傳拯入魏城疑而不用延光降高祖授傳拯諸
衛將軍出為寧州刺史境接蕃部以前弊政滋章民甚
苦之傳拯自下車除去弊政數十件百姓便之不數月

移刺號州離寧州日衙門聚數千人折橋遮道以畱之
及赴號州治理清靜蒸民愛戴如寧州焉開運中厯武
州刺史受代歸洛遇疾卒傳極家本多財尤好賓客及
厯數郡不事生產將即世甚貧匱物論惜之

祕瓊鎮州平山人也父遇以善射厯本軍偏校累官至
慶州刺史瓊亦驍勇清泰中董溫琪為鎮州節度使擢
瓊為衙內指揮倚以腹心及溫琪陷蕃瓊乃害溫琪之
家載其屍都以一坎瘞之溫琪在任貪暴積鏹巨萬瓊

悉輦之以藏其家遂自稱留後高祖即位遣安重榮代之授瓊齊州防禦使時重榮與蕃帥趙思溫同行部曲甚衆瓊不敢拒命尋索其奇貨由鄴中以赴任先是鄴帥范延光將謀叛逆牙將范鄴持書搆瓊瓊頌書不答使者還具達其事延光深忿之及聞瓊過其境密使精騎殺瓊于夏津以滅其口一行金寶侍伎皆為延光所有由是延光異志益露焉

李彥珣邢州人也少為郡之牙吏唐天佑中明宗鎮其

地彥珣素無檢飾因洽于左右明宗即位以為通事舍人嘗遣使東川行至其境其僕從為董璋所收彥珣竄還以失敬故也朝廷攻璋詔授行營步軍都監彥珣素不孝于父母在鄉絕其供饋同列惡其鄙惡旋出為外任清泰中遷河陽行軍司馬遇張從賓為亂因朋助之從賓敗奔于魏州范延光既叛署為步軍都監委以守陴招討使楊光遠以彥珣見用欲撓延光而誘彥珣乃遣人就邢臺訪得其母令于城下以招之彥珣識其母

發矢以斃之見者傷之及隨延光出降授坊州刺史近臣以彥珣之惡逆奏于高祖高祖曰赦命已行不可改也遂令赴郡後不知其所終焉

歐陽史云彥珣後以坐職誅

史臣曰昔從簡從莊宗戰于河上可為勇矣及其為末帝守于孟津豈得為忠乎忠既無聞勇何足貴潘環方太雖咸負雄幹而俱歿亂世蓋方畧不足以衛其身故也何建舉秦隴之封附巴邛之俗守方之寄其若是乎其餘皆儋珪析爵之流也亦可以垂名于世矣秘瓊既

覆董氏之族旋為鄴帥所屠何報應之速也唯彥珣忍
射其親殆非人類晉祖宥之不戮益失刑之甚也

舊五代史卷九十四

舊五代史卷九十四攷證

晉列傳九萇從簡傳贈太傅○案歐陽史作贈太師
方太傅及劉晞南走許州○劉晞通鑑攷異作劉禧
何建傳○何建九國志作何重建

張廷蘊傳會潞州李繼儔故將楊立嬰城叛詔遣明宗
為招討使元行欽為都部署廷蘊為前鋒○案歐陽
史云李繼韜叛于潞州莊宗遣明宗為招討使元行
欽為都署廷蘊為馬步軍都指揮使將兵為前鋒吳

續纂誤据梁本紀及元行欽李繼韜傳云並無明宗
元行欽張廷蘊攻潞州之事今考是書本言廷蘊平
潞州楊立之叛歐陽史以為平李繼韜殊誤通鑑後
是書

舊五代史卷九十四攷證